

Սակայն առ ժամն ոչ կարացին Հայք 'ի գլուխ տանել զգործն, այլ զկնի վեց ամաց նորոգեաց զայն Անգրիաս Պատրիարք ըստ մտաց հրովարտակին, և յետ լրման գործոյն՝ զնաց զատաւորն բազմութեամբ 'ի քննութիւն, և եգիտ զամենայն ինչ ըստ հրամանի Արքային, (1571):

Անտանելի էին բռնութիւնք այլազգեաց՝ և կարի գըժուարին յազեցուցանել զնոսա, և շիջուցանել զցասումն սրտմտութեան նոցին, զի չեւ եւս մոռացեալ էին Հայք զնեղութիւնս զոր կրեցին յայլազգեաց ամօք յառաջ վասն սեփնականութեան իւրեանց. և ահա 'ի սմին ամի նորոգեցաւ դառնութիւնն. զի միւսանգամ ամբարձին գըլուխ՝ և խնդրէին գրաւել զայգիս և զձիթենիս, թէ 'ի մէջ քաղաքին և թէ արտաքոյ նորին, և զգերեզմանատունն իսկ գլխովին. և պահանջէին 'ի միաբանաց բազում ինչ, և 'ի չգտանել զեւ իրաց և զերծանիլ 'ի ձեռաց նոցա. Անգրիաս Պատրիարք գրեաց գիր աղաչանաց առ Արքայ, և 'ի ձեռն հաւատարմին իւրոյ առաքեաց զայն 'ի Թագաւորեալ քաղաքն. յայտ արարեալ զտառապանս և զնեղութիւնս իւր՝ զոր կրէր յերեսաց այլազգեաց. գրեցաւ հրովարտակ առ դատաւորն, չլսել զայնպիսի դատոս և զամբաստանութիւնս առանց Արքունի հրամանի. մանաւանդ որ անցեալ իցէ ամս 15. գիտելով թէ այլազգիք ստիս աղահուսկեան իւրեանց՝ հակառակ օրինաց եւ կայսերական հրամանի՝ յարուցեալ են 'ի վերայ ստացուածոցն Հայոց. ապա պատուիրէ մերժել զնոսա, եւ չլսել զդատոս նոցա, և զանհնազանդսն ծանուցանել 'ի Դուռն, և չտալ թոյլնեղել զազգն Հայոց. 'ի Ծ Մուհարրէմ, ԳՎՀ (1566):

Անգրիաս եպիսկոպոս, յետ բարուք կառավարելոյ զաթոռն երուսաղէմի, և վարելոյ զիշխանութիւն Պատրիարքութեան ամս 29 վախճանեցաւ, սա արար շինութիւնս և նորոգութիւնս 'ի վանօրայս, և վաստակեցաւ 'ի զանազան գործս աթոռոյն, կրեալ վիշտս և դառնութիւնս յօտարաց, զնեաց զտունս յայլազգեաց առաջի վանաց Ս. Յակոբայ յարեւմուտս կոյս, և քակեալ զնոսա՝ զտեղին արար պարտէզ ձիթենեաց, և զմի մասն նորին զնեաց յաջորդն Դաւիթ եպիսկոպոս (1571):

Զկնի վախճանի Անգրիաս եպիսկոպոսի, ընտրեցաւ յա-